

Naalakkersuinikkut ingerlatsisut partiit naatsorsuutaasa tamanut saqqummiuneri pillugit Inatsisartut inatsisaata allanngortinneranik Namminersorlutik Oqartussat nalunaarutaat

Matumuuna nalunaarutigineqarput Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaat nr. 15, 22. novmeber 2011-meersoq Inatsisartut inatsisaata nr. 14-ip, 4. februar 2025-meersup malitsigisaanik allannguutitalik

Naalakkersuinikkut ingerlatsisut partiit naatsorsuutaat

§ 1. Partiit Folketingimut Inatsisartunulluunniit Kalaallit Nunaanni qinersinermi kingullermi qinigassanngortitaqarsimasut qaammatsiutit ukiui tamaasa partiip nuna tamakkerlugu kattuffiata isertitaanut aningaasartuutaanullu ukiumoortumik naatsorsuutini kukkunersiukkanik saqqummiussaqtassapput. Isertitat assigiinngitsut makku pillugit paasissutissanik ukiumoortumik naatsorsuutit imaqtassapput:

- 1) Pisortaniit partiimut tapiissutit.
- 2) Ilaasortat akiliutaannit isertitat.
- 3) Qulaani taaneqartut saniatigut inuinnarnit tapiissutit allat.
- 4) Inatsisilerinikkut inuttut isigineqarsinnaasunit, taakkununga ilanngullugit ataatsimut kattuffinnit namminersortunit, sulianut atatillugu suliniaqatigiiffinnit, inuussutissarsiortut suliniaqatigiiffinit, inuussutissarsiutugalugu suliffeqarfinnit, aningaasaateqarfinnit peqatigiiffinnillu, tapiissutit.
- 5) Ernianit isertitat.

Imm. 2. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutini imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsisimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput, tapiissuteqartumit tapiissutit tamarmiusut nalunaarlugit.

Imm. 3. Partii ukiumi naatsorsuuteqarfiusumi tapiissuteqartumit ataatsimit ataasiarluni arlaleriarluniluunniit tapiissutini imm. 1, nr. 4-mut ilaatinneqartunik pissarsiaqarsimappat, tapiissuteqartup aqqa najugaalu ukiumoortumik naatsorsuutini takuneqarsinnaassapput, tapiissuteqartumit tapiissutit tamarmiusut nalunaarlugit.

Imm. 4. Ukiumoortumik naatsorsuutit oqimaqatigiissitsineq aamma nammineq aningaasaatit pillugit paasissutissanik imaqtassapput.

Imm. 5. Ukiumoortumik naatsorsuutit ilassutitut nassuiaammik paasissutissaajunnartunik partiip nuna tamakkerlugu kattuffiata § 4 aamma § 4 a malillugit pissarsiarisimasaanik imaqtassapput.

§ 2. Ukiumoortumik naatsorsuutit partiip aqutsisuinit atsiorneqassapput aamma ukiumoortumik naatsorsuutini allanneqarsimasunik partii allanik isertitaqarsimannginneranik aningaasartuuteqarsimanngeranilluunniit nalunaarummik imaqtassallutik.

§ 3. Ukiup naatsorsuiffiusup naaneraniit kingusinnerpaamik qaammatit arfinillit qaangiutsinnagit partii ukiumoortumik naatsorsuutini Inatsisartunut nassiussissaaq. Ukiumoortumik naatsorsuutit Inatsisartut Siulittaasooqarfiata tamanut saqqummiutissavai.

Immikkoortortaqaqfiit aamma inuusuttut immikkoortortaqaqfiit paasissutissiisussaataitanerat

§ 4. § 1, imm. 1-mi ilaasup partiip immikkoortorta qarfia imaluunniit inuusuttunut immikkoortorta qarfia ukiumi ilivitsumi § 1, imm. 1, nr. 3-4-mi taaneqartunik akilee qataassutini, katillugit 40.000 kr.-inik amerlanerusunik tigusaqarsimappat, immikkoortorta qarfik ukiup ilivitsup naaneraniit kingusinnerpaamik qaammatit sisamat qaangiutsinnagit partiip nuna tamakkerlugu kattuffianut makku pillugit paasissutissanik nassiussissaaq:

- 1) Akilee qataassutit tamarmiullutik annertussusaat.
- 2) Tapiissutit ataasiakkaat annertussusii, tapiissuteqartup aqqa najugaalu nalunaarlugit:
 - a) immikkoortorta qarfik tapiissuteqartumit ataatsimit ataasiarluni arlaleriarluniluunniit tapiissutini imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsiaqarsimappat, imaluunniit
 - b) immikkoortorta qarfik tapiissutini § 1, nr. 4-mut ilaatinneqartunik pissarsiaqarsimappat.

Ilaasortat qinigassanngortissimasullu paasissutissiisussaatitaanerat

§ 4 a. Partiimut § 1, imm. 1-imut ilaatinneqartumut ilaasortaq naalakkersuinikkut sulinerminut allanit parteerinngisaminit tapiissutini, ilaatigut qineqqusaarnermut tapiissutini, qaammatisiutit ukiuanni pissarsiaqarsimappat, ilaasortaq qaammatisiutit ukiuata naanerata kingorna qaammatit sisamat qaangiutsinnagit uku pillugit partiip nuna tamakkerlugu kattuffianut paasissutissanik nassiussaqassaaq:

- 1) tapiissutit tamarmiullutik annertussusii, aamma
- 2) tapiissutit ataasiakkaat annertussusii, tapiissuteqartut aqqi najugaallu nalunaarlugit:
 - a) ilaasortaq tapiissuteqartumit ataatsimit ataasiarluni arlaleriarluniluunniit tapiissutini imm. 1, nr. 3-mut ilaatinneqartunik katillugit 1.000 kr.-init amerlanerusunik pissarsiaqarsimappat, imaluunniit
 - b) ilaasortaq tapiissutini § 1, nr. 4-mut ilaatinneqartunik pissarsiaqarsimappat.

Imm. 2. Inuit partiimut ilaasortaanngikkaluarlutik Folketingimut Inatsisartunulluunniit qinersinermi kingullermi partii sinnerlugu qinigassanngortissimasut ilaasortatut isigineqassapput.

Kinaassutsimik isertuussilluni tapiissutit nunanillu allanit tapiissuteqartunit tapiissutit

§ 4 b. Partiit, najukkani inuusuttunullu immikkoortorta qarfiit ilanngullugit, nunanit allanit kinaassutsimilluunniit isertuussilluni tapiissuteqartunit tapiissutini § 1, imm. 1, nr. 3-4-mut ilaatinneqartunik pissarsiaqarsinnaatitaanngillat. Nunanit allanit tapiissuteqartutut paasineqassapput tapiissuteqartut Kalaallit Nunaata avataani najugaarlutilluunniit angerlarsimaffillit. Nunanit allanit tapiissuteqartunit tapiissutini pissarsiaqarsinnaatitaannginnermut partiinit kunngeqarfimmi nalunaarsorneqarsimasunit tapiissutit ilaatinneqanngillat.

Imm. 2. Partiit, najukkani inuusuttunullu immikkoortorta qarfiit ilanngullugit, tapiissutini imm. 1-mi taaneqartunik tunineqarpata, partiip tapiissutit pissarsiarineqarnerinit sapaatit akunnerisa sisamat qaangiutinnginnerini tapiissutit utertissavaat. Tapiissutit utertinneqarsinnaanngitsut nunatta karsianut nakkartinneqassapput, pissarsiarineqarinearnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

Imm. 3. Imm. 1 aamma 2 taamaaqataanik ukununga atuutissapput:

- 1) Folketingimut Inatsisartunulluunniit ilaasortanut taakkulu sinniisussaannut, aamma
- 2) inunnut Folketingimut Inatsisartunulluunniit qinersinissamut aggersumut qinigassanngortissimasunut.

Tapiissutitut pissarsiarineqarsinnaasunut killiliussat

§ 4 c. Partii qaammatisiutit ukiuanni ataatsimi tapiissutini § 1, imm. 1, nr. 3-4-mut ilaatinneqartunik katillugit 200.000 kr.-init sinnilinnik, imaluunniit tapiissuteqartut ataasiakkaat eqqarsaatigalugit 20.000 kr.-init sinnilinnik, pissarsiaqarsinnaatitaanngillat.

Imm. 2. Partii tapiissutitut pissarsiarineqarsinnaasunut killiliussaq imm. 1-mi taaneqartoq sipporlugu pissarsippat, tapiissutit pissarsiarineqarnerisa kingorna sapaatit akunneri sisamat qaangiutsinnagit tapiissutit ilaat sipporuttut partiip utertissavai. Tapiissutit ilaat sipporuttut utertinneqarsinnaanngitsut nunatta karsianut nakkartinneqassapput, pissarsiarineqarnermillu kingorna sapaatit akunnerisa arfineq-pingasut qaangiutinnginnerini kontumut aningaasaqarnermut naalakkersuisoqarfimmit innersuussutigineqartumut nuunneqassallutik.

Pineqaatissiinerit, atulersinnera il.il.

§ 5. Tulliuttunut akiliisitaanermik pineqaatissiisoqarsinnaavoq:

1) § 2-mik, § 3-mi oqaaseqatigiit siulliannik, § 4-mik, § 4 a-mik, § 4 b, imm. 2-mik aamma § 4 c, imm. 2-mik unioqqutitsinermut,
2) §§-it 1, 4 aamma 4 a malillugit paasissutissanik eqqunngitsunik amigartunilluunniit tunniussaqaqarnermut, aamma

3) § 2 malillugu eqqunngitsumik nalunaaruteqaqarnermut.

Imm. 2. Inatsisartut inatsisaat akiliisitsinissamut tunngavissiippat Kalaallit Nunaanni pinerluttulerinermik inatsimmi inatsisitigut pisussaataaasup pisinnaatitaasullu akisussaaffia pillugu maleruagassat malillugit partiip kattuffia akiliisinneqarsinnaavoq.

Imm. 3. Akiliisitsissutit imm. 1-2 malillugit aalajangersarneqartut nunatta karsianut nakkartinneqartassapput.

Imm. 4. § 4 b, imm. 2-mik aamma § 4 c, imm. 2-mik unioqqutitsisoqartillugu Kalaallit Nunaanni pinerluttulerinermi inatsimmi malittarisassat malillugit arsaarinnittoqarsinnaavoq. Arsaarinnissutit nunatta karsianut iluaqutissanngortinneqassapput.

§ 6. Inatsisartut inatsisaat ulloq 1. januar 2013-mi atulersinneqarpoq.

Imm. 2. § 1 malillugu naatsorsuutit 2013-mut ukiumut naatsorsuiffik pillugu siullermeertumik nassiinneqassapput.

Naalakkersuinikkut ingerlatsisut partiit naatsorsuutaasa tamanut saqqummiunneqartarneri pillugit Inatsisartut inatsisaata allanngortinneqarneranik Inatsisartut inatsisaat nr. 14, 4. februar 2025-meersoq (Naalakkersuinikkut sulinermit inunnit inatsisilerinikkullu inuttut isigineqarsinnaasunit tapiissutinik pissarsisarneq pillugu paasissutissiisussaataanerup sakkortusineqarnera, kinaassutsi-mik isertuussilluni nunanillu allanit tapiissutinik tunineqartarnermik inerteqquteqaqarnej, tapiissutit annertussusiinut killigigitat) §§-inut 1, 4, 4 a, 4 b, 4 c aamma 5-imut tunngasoq, atuutilersitsinis-samut aalajangersakkamik tulluuttumik imaqarpoq:

§ 2

Inatsisartut inatsisaat Inatsisartut inatsisaata tamanut nalunaarutigineqarnerata aqaguani atuutilissaaq.

Imm. 2. § 1, nr. 5, 6 aamma 8 kiisalu § 4a, § 1, nr. 10-kkut ilanngunneqartoq, siullermik atuutilissapput tapiissutitut ukiumi naatsorsuuteqaqarfiusumi 2025-mi pissarsiarineqartunut.

Naalakkersuisut Siulittaasuata Naalakkersuisoqarfia maajip.13.2025

Hans-Peder Barlach Christensen (atsiorn.)

Naalakkersuisoqarfimmi Pisortaq

/Stefan Krehbiel (atsiorn.)

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut